

Firaun Kī Naafarmaanī

Taurait : Hijrat 11:1-10

Allaah taa'alā ne Musā^(a.s) se kahā, "Maiñ Firaun aur Misr par ek aur tabaahī laauñgā aur iske baad wo tumko jaane degā, asliyat me wo tum logoñ ke saath zabardastī kar ke purī tarah se baahar nikaalegā.⁽¹⁾ Tum apne logoñ se kaho, "Har ādmī aur har aurat apne paðosiyoñ se sone aur chaañdī kī cheezeñ maañge."⁽²⁾

Allaah taa'alā ne Misriyoñ ko un logoñ par meharbaan kar diyā thā. Musā^(a.s) ko k̄hud bhī wahaañ ke log aur Firaun ke bađe afsar bahut azeem samajhte the.⁽³⁾ Musā^(a.s) ne Firaun se kahā, "Ye Allaah taa'alā ne kahā hai: Āj ādhī raat ko maut kā farishtā pure Misr se ho kar guzregā⁽⁴⁾ aur Misr kā har pahalauthā betā mar jaaegā. Firaun ke pahale betē se le kar uskī ātā peesne waalī naukraanī kā pahalā betā bhī, yahaan tak ki unke jaanwaroñ ke pahale bacche bhī mar jaaeñge.⁽⁵⁾ Misr me aisā rone-peetne kā maahaul hogā, ki nā pahale kabhī huā hai aur nā hī āne waale waqt me kabhī hogā.⁽⁶⁾ Lekin mere Ibraaniyoñ kā ek bhī pahalauthā betā naheeñ maregā. Nā hī unke kisī jaanwar ko choṭ pahuñchegī aur nā hī kutte un par bhaukeñge. In sab se tumheñ ańdaazā ho jaaegā ki maiñ Ibraaniyoñ aur Misriyoñ ke beech me farq kar rahā huñ.⁽⁷⁾ Tumhaare ye saare afsar mere paas āeñge aur sajdā kar ke kaheñge, 'Hameñ bakñsh deejie aur apne saare logoñ ko apne saath le jaaeee, jo āpkī ibaadat karte haiñ.' Maiñ tabhī wahaañ se waapas āuñgā."⁽⁸⁾ Musā^(a.s) Firaun ke paas se bađe gusse me lauñ ãe.⁽⁹⁾ Allaah taa'alā ne Musā^(a.s) se kahā, "Firaun ne tumhaarī baat naheeñ sunī, islie Misr me merā qahar dugnā ho jaaegā."⁽¹⁰⁾

Musā^(a.s) aur Haarun^(a.s) ne Allaah taa'alā kī atā kī huī nishaaniyaan Firaun ko dikhaaeeñ, lekin us par koī asar naheeñ huā. Allaah taa'alā ne uske sakht dil ko aur sakht kar diyā thā.^[a] Firaun ne unke logoñ ko Misr se baahar jaane kī ijazat naheeñ dī.

[a] Quraan Majeed : Al-Baqarah 2:10: Unke diloñ me beemaarī thi aur allah taa'alā ne unkī beemaarī ko aur bađhā diyā.